

插图本中国古代史料集成

(第一輯)

一四

綫裝書局

御製大明會典序

朕惟自古帝王君臨天下。必
有一代之典。以成四海之治。
雖其間損益沿革。未免或異。
要之不越乎一天理之所寓
也。純乎天理。則垂之萬世而
無弊。雜以人為。雖施之一時。

而有違。蓋有不可易焉者。唐虞之時。堯舜至聖。始因事制法。凡儀文數度之間。天理之當然。無乎不在。故積之而博。厚。發之而高明。巍然煥然。不可尚已。三王之聖。禹湯文武。視堯舜固不能無間。而典制

寢備。純乎是理則同。是以雍熙泰和之盛。同歸於治。非後世之所能及也。自秦而下。世之稱治者。曰漢。曰唐。曰宋。其間賢君屢作。亦號小康。但典制之行。因陋就簡。雜以人爲。而未盡天理。故宋儒歐陽氏

謂其治出於二。其不能古若
也。夫豈無所自哉。洪惟我
太祖高皇帝。以至聖之德。驅胡
元而有天下。凡一政之舉。一
令之行。必集羣儒而議之。遵
古法。酌時宜。或損或益。燦然
天理之敷布。

神謨聖斷。高出千古。近代積習
之陋。一洗而盡焉。我

太宗文皇帝。

仁宗昭皇帝。

宣宗章皇帝。

英宗睿皇帝。

憲宗純皇帝。

聖聖相承。先後一心。雖因時損益。而率由是道。百有餘年之太平。端有在矣。朕祇承天序。即位以來。蚤夜孜孜。欲仰紹先烈。而

累朝典制。散見疊出。未會于一。乃勅儒臣。發中祕所藏諸司

職掌等諸書。參以有司之籍。冊。凡事關禮度者。悉分館編輯之。百司庶府。以序而列。官各領其屬。而事皆歸於職。名曰大明會典。輯成。來進。總一百八十卷。朕間閱之。提綱挈領。分條析目。如日月之麗天。

而羣星隨布。我

聖祖

神宗百有餘年之典制。斟酌古
今。足法萬世者。會粹無遺矣。
特命工鐫梓。以頒示中外。俾
自是而世守之。不遷於異說。
不急於近利。由朝廷以及天

下。諸凡舉措。無巨細精粗。咸當乎理。而得其宜。積之既深。持之既久。則我國家博厚高明之業。雍熙泰和之治。可以並唐虞。軼三代。而垂之無窮。必將有賴於是焉。遂書以為序。

弘治十五年十二月十一日

御製大明會典序

朕惟古之君天下者。或創業立法。或因時制宜。皆有冊籍。以垂久遠。其見于書。若唐虞之世。則有典謨。夏有典則。商有謨言。周之禮制。號稱大備。下及漢唐宋。皆有會要。而唐

之六典尤詳且悉。我

太祖高皇帝稽古創制。分任六卿。著為諸司職掌。提挈綱領。布列條貫。誠可為億萬年之大法也。顧其為書。作于洪武之中。歲晚年績定者。雖官署名職。間有更易。

列聖相承。隨時與事。因革損益。
代各不同。而皆不失乎。

皇祖之意。是以政化旁行。重熙
累洽。有前代所不及。然歲月
既積。簿籍愈繁。分曹列署。或
不能徧觀盡識。下至遐方僻
壤。閭閻草野之民。盖有由之。

而不知者。迨我

英宗睿皇帝復辟之時。嘗命內閣儒臣纂輯條格。以續職掌之後。未底于成。

皇考孝宗敬皇帝繼志述事。命官開局纂輯成編。釐為百八十卷。其義一以職掌為主。類